

SANTIAGO CARTA

Israel ji'j mteeva jyuca üssaty Santiago fi'jni

1 ¹ Israel nasa doce ji'jsa naa quiwete msuuva jyuca üssaty wechana fi'jatstju Jesucristo vite' Dyusna selpisáa Santiago yaasesa.

Dyus yacj shiingmée fi'nzewa'ja's Dyus írráac caajiyu'ju'

² Andy yacjtjê'jwe'sh, ñusmée meswe wechwecha yajcyna ma'wēsava tjēysa vyaateva. ³ Mjiyuwe: Dyusa's jweeírráa chjächja yajcyya' piyacajnírráac tyā'wē tjēysa' vya'. ⁴ Atsa' tjēysa vyaateva üucjnuwe, tyāa tjēysa' i'cue'sh quijte yujva shiingmée jyuca Dyus yacj chjächja fi'nzewa'ja's caapiya'jsa'.

⁵ Maava Dyus yacj fi'nzewa'ja's shiinguutsrra', Dyusa'sírráa mpējywe, atsa' tyā' wa'lmée maatyva jyuca caajiyu'juna i'cue'sh pēynite tjaacue. ⁶ Nava kuj jwend yajcymée üsyujuna sūjna yuurráa mpējywe. Tyā'wēme', kuj jwend yaacysa' tee jwendterráa üsmée ícj wala's wejyaa quēese'jni na'wē yuutyna. ⁷ Atsa' tyā'wē tee jwendrráa yaacysame' Dyusa' üsuna sūjwa'j ji'pjme'. ⁸ Maava Dyusa' pasmée váanacy sūjna e'nz jwend yajcyna pēysa' bagachte yujva Dyus yacjrráa fi'nzeya' yu' ajameena.

⁹ Maa yacjtjê'jva quijva ji'pjmeesarrava wechwecha yajcyna fi'nzewa'j ji'pja', Dyusa' pu'chjina sūjna. ¹⁰ Atsa' tyā'wēy ji'pjsava tyajy ji'pjuni ptsuwa'j en pa'tjeva, wētwtē yaacywa'j ji'pja', tyāa pa'gatey naa quiwete ji'pjsa' quiteva ma'wēga tyachmeyna undyi' tyā'wēysarrá'. ¹¹ Sec achaate', jyūtj tasha' undyi'c, naapcachja' quiteva umbu'c, atsa' zhichcuesa' cytee ptsu'c. Tyā'wēy naa quiwete ji'pjsava tyajy ji'pjuni yacj ptsuwa'jsarrá'.

Ewmée yūuya' yaacynisa's Dyusa' úsu'tsme'

¹² Ewmeete cweete'jwa'jsa vyaateva, tyā'sa' nwēese'jsame' wala yuj wētwtē yaacywa'j ji'pja'. Tyāa pa'gatey tyā'wē yūusa' bagachte yujva ptsumée ityi fi'nzewa'ja's Dyus üsya' neeyüuc tyā'sa' jypa'gawa'jsa' Dyusna nwēese'pja'ga. ¹³ Maava ewmeete weterra', Dyus ne' tyā'wēte wetewa'ja's vit sūjwa'jme'. Dyusa' ewmeete wetewa'ja's bagachte yujva üsmeena. Tyā' ewmée yūusame'. ¹⁴ Wejyva peecy üus ewmée yaacyni's

nwēese'pja'garráaty ewmeete wetena pa'ja'. ¹⁵Na'wē ewmée ūus yaacynic pcalte cweete'je', atsa' tyāa pcalcu jweeíírráa walaana u'jrra nmejte' uuwa'jrráa vitna pa'ja'.

¹⁶Yacjtjē'jwe'sh mjiiyuwe: ¹⁷Na'wē Dyusa' cielute eena' cweetjsaty jyuca vitcu sa' tyā' āchpcach le'chcuerráa yujva yu'ptjejmée ūsa', atsa' tyajy tashurrarráa yuusata' quíjva ewsa yu' jyuca. ¹⁸Tyāac cue'shtyi peeygājrra tyajy yuwe isasa's pta'shrra ewte fi'nzewa'ja's ūs, cue'sh nyafyte tyāa yacj utyasáa yuucajn.

Dyus yuwe ma'wē jycaatje' cytey yuusaarráa Dyus yacj fi'nzesa'

¹⁹Tyāa pa'ga andy yacjtjē'jwe'sh quíjva pta'shni ewsa yu'sa' bagachteva wa'lmée jypa'gayarráa meswe. Nava we'wewa'j yu'sa' ūus yajcyrra jypa'yajcy mwe'wewe, sa' ūuschawa'j yu'sa' wejy wala mpa'yajcywe.

²⁰Tyā'wēme', ūuschanisa' Dyus dyi'pte ewmeesa', atsa' Dyusa' tyā'wēsa's jypa'ga'tsme'. ²¹Tyāa pa'ga quíjva ewmeesa nacue wala pejnaya' dunda' tyāa yu'sa' jyuca nvíjrra, Dyus yuwe ewsa pta'shni yuuc tyā'srráana wa'lmée ūuste myu'acjwe. Dyus pta'shni' i'cue'sh ūusa's nwe'weya' ājawa'jsa'.

²²Nava Dyus yuwe ma'wē jycaatje' tyā'sa' cytey myuuwe. Wēse'jsarráa yu' yuunuwe. I'cue'sha' jypumbanuwe. Í'neerráa wēse'jnisa' cyulsa'.

²³Maava tyā'wē Dyus pta'shni's cytey yuumée í'neerráa wēse'jsa', peecy dyi'pa's speejute tjengrra ²⁴cjüchte uyrrava tyāa dundtey cjucjmée u'jyā'jrra' ma'wē pechcanacy tyā'wēysa'. ²⁵Nava wēse'jrra pechcanamée, Dyus ley ewte nviit-sa jycaajni's cytey nwēese'jsa', jypumbamée wēt fi'nzena Dyus jycaajni's nwēese'jna.

²⁶Maava Dyus dyi'pte ewsatj sūjrrava ma'wēwa we'weni's jypa'yacymeerra', peequíírráa jypumbasáa yuuna. Atsa' Dyus dyi'pte ew fi'nzesatj sūjni' cyul yuj yuuna. ²⁷Dyus dyi'pte quíjte yujva jypumbamée ew fi'nzesa' na'wē yūuwa'ja': Nmi' jil'pjmée puuplesaty pu'chna ūuste fi'nzesaty cviisha'jna luuch wacchajtyva tyā'wēy yūuwa'ja', sa' naa quiwete ewmeesa peecy ūuste cjēewe'shte wala jypa'yacywa'ja'.

Nasa ma'wēsatyva tyāa na'wērrarráa ew yūuwa'ja'

2 ¹Andy yacjtjē'jwe'sh i'cue'sha' Jesucristo tyacue ewsana ūuste jypa'gayā'jrra', nasa maatyva puuty ja'ndarraj tyāa na'wērrarráa ew yūuwa'j jil'pji'cue. ²Meerrava na'wē vaa yuune'cue: I'cue'sh pcjaacjeni yatte teech pitstjē'j ropa wala ewsa atjrra, vyuu bee sultyjicja paatrra u'cana, naapcachja' viteva pa'jana quíjva jil'pjmée ropa iishcuesa atjrra. ³Atsa' tyāa ropa ewsa iijyūusa's ew jypa'garra cachni ewsate cach cajane'cue. Nava quíjva jil'pjmée pytjaacuēesa's yu': Ayte myuju meerra' cytee quiwete mcaach jīne'cue. ⁴Tyā'wē yūurra', puuty ja'ndarraj tyāa na'wērrarráa ew yūusamée, vite yu'sa' atseyaacysarra tyā'wē yuune'cue.

⁵Andy yacjtjêl'jwe'sh ew mwêese'ljwe: Naa quiwete macue quíjva jì'pjmée pytjaacuéesarrava tyāawe'sha' Dyusa's yu' ma'wērráa yujva pechcanamée ūuste yajcyna fi'nzerra Dyus jycaajna ūsnitewe'sha's Dyusí ūsya' neeyūuc Dyusna yaacysatyì' tyā'sna jypa'gawa'jsata'. ⁶Tyā'wēteva, i'cue'sh yu' tyāa jì'pjmée pytjaacuéesatyì' weechrra jì'pjsarráaty i'cue ew we'we'. Nava jì'pjsaírráa i'cue'shtyi pcyuurra ¿cjuēs tashsu cuutya'jsamée váatyna? ⁷Tyāawe'shírráa Cristo yase's ¿atsewe'wesamée váatyna?

⁸Dyus ley maateva tjaacuesa we'werra': Vite nasatyva peeygāawa'ja' indy ma'wēnga ya'peeygāja' tyā'wēyrráa jì'c. Atsa' tyā'sa' cytey nwēese'jna fi'nzerra', ewsarraj tyā'wē yuune'cue. ⁹Nava maatyva jyuca tyāa na'wērrarráa ew yūumeerra', pcalte weteene'cue, sa' Dyus jycaajni leya's yuuwesa yuune'cue, leya's jyuca nwēese'pja'gamée. ¹⁰Maava Dyus jycaajni leya's ew yuj nwēese'jrrava teech ajte le'chcuērráava jypumbaana atsa' tyāa pa'garráa Dyus jycaajni ley macueteva jyucac yuuwesa yu'. ¹¹Miiyajcywe vacy Dyus leya' na'wēc we'we': Ptamsayā'ja' vitesa yacj pcal yuuwa'jme' jì'c. Sa' nasanava icjwa'jme' jīnac jycaaja'. Tyā'wē yā'tje', nasa yu's icjmeerrava, vitesa yacj yu' pcal yuuváana atsa' tyāa pa'garráa Dyus jycaajni ley macueteva jyuca nwēese'jsamée yuuna. ¹²Tyāa pa'ga i'cue'sha' we'wewa'j ma'c yuu, meerra' ūus yaacyni yacjrráa ma'c yuu, nava wala jypa'yacymeete', i'cue'shtyi nwe'wesa leya' castigaína. ¹³Vitety peeygājmée fi'nzesatyì' tyā'wēy Dyusva tyāawe'shtyi' peeygājmée castigaína. Nava vitety peeygājna fi'nzesatyì' Dyusva peeygājrra castigaímeena.

Dyusa's yaacysatj jīsa' āate caavya'jal'jwa'ja'

¹⁴Andy yacjtjêl'jwe'sh miiyajcywe: Maava Dyus yacj fi'nzesatj jīrrava ew yūuna fi'nzeni yacj caavya'jal'jmeete', tyā'wē yuwejurráa we'wenírráa ¿seelpimañ? ¹⁵Na'wē ūus yaaquiga: Maa yacjtjêl'jva ropa jì'pjmée tyā'wēy ū'wa'jva peejysa ūsuna, ¹⁶atsa' tyā'wēsa's i'cue'sha' uyrra': Pytjaanga yuuna fi'nze'. Nava āchja' wēemée cumamée ew mfi'nze jīrrava, tyajy cacuete peejini's quíjrráava caatu'ljmeerra yuwejurráa tyā'jīni' ¿quíjrrá' selpiima'c? ¹⁷Tyā'wē Dyus yacj fi'nzesatj jīsa' āate caavya'jal'jwa'ja'. Tyā'wēme', yuwejurráa tyā'jīnisa' cyul yuja'.

¹⁸Nava na'jīváatyna: Indya' Dyus yacj fi'nzesarra', ¿ma'wē caajiyu'juqui'ng Dyus yacj yuj fi'nzesan sūjcajn? Atsa' quíjva yūumeerrava mcaajiyu'l'j aan ājane'nga. Atsa' andya' ew yūuna pu'chnisa yacjrráa Dyus yacj fi'nzeni's āate caavya'jal'jya' āja'nja jītya. ¹⁹Indya' teech Dyusrráa cielute ūsteva tyā'sa' ew jiine'nga ūuste. Tyā'wē yūuni' ew yuja'. Nava echtjêl'jva Dyus ūste ew jīita' indy na'wēy. Tyā'wērraíity ūucjna yaya'. ²⁰¿Ma'wētenga jiyu'tsmée? Yuwejurráa Dyus yacj fi'nzesatj jīni' cyul yuj yuuna, Dyus yacj fi'nzeni's āate caavya'jal'jmeete yu'. ²¹Cue'sh yatsgatjêl'j Abrahana' Dyusna yaacyni's āate caavya'jal'jna tyajy nchi'c Isaacja's

altalte icjya'vac yu'. Tyã'wë Dyusna yaacyni's äate caavya'ja'pja'ga, Abrahana's Dyusa' yuuwemeesac vit. ²² Ächja' ¿jiyungá? Abrahana' äate caavya'ja'cj Dyusna yaacyni's sa' yuwejurráa Dyusna yaaqui'tj jímée, Dyusa's üusuj jyuca yajcyrra äate caavya'ja'cj. ²³ Abrahana' Dyusa's üusuj jyuca yajcyrra cytey yuupa'ga, Dyus librute na'wëc fi'jni neeyüu: Abrahana' Dyus dyi'pte ewtec neeyüu jina. Sa' tyã'wëy Abrahana' Dyus namicu' jinic neeyüu.

²⁴ Ächja' jiyui'cue, yuwejurráa Dyusa's yaaqui'tj jímée, Dyusna yaaquitsrra' äate caavya'ja'jwa'ja'. ²⁵ U'y canzh yuusáa Rahabva Dyusna yaacyni's äate caavya'ja'cj na'wë yüuna: Tyajy yatte pitstjël' peetjengu'na pa'jsaty jypa'garra', tyãa pitstjël'jty nwe'werra vitee dyi'jsuc caaj tyãa u'ya'. Atsa' tyã'wë ew yüupa'ga tyã'sa' Dyus dyi'pte ewtec neeyüu. ²⁶ Cue'sh cacueva ma'wëga üus ji'pjmeerra' uuní yu', tyã'wëy Dyusna yaaqui'tj jínisa' seelpimeesa', ew yüuna pu'chnisa yacj äate caavya'ja'jmeete yu'.

Cue'sh tjune' na'wësa'

3 ¹ Andy yacjtjël'jwe'sh, maava jyuca caapiya'jsarra' jiisatja'w süjrra nuywe'wenuwe. Caapiya'jsarrava jypa'yajcy mfi'nzewe. Tyã'wëme', caapiya'jsafírráa tjaacue yuuwesa yu'nja'w. ² Maa yujva jiisa yu' meetja'w. Tyãasa íitja'w quíjteva jyuca jypumba'. Nava maava tyajy we'weni's jypa'yacyya' äjana tyã' ewsarraj tyã'wë yuuna. Sa' tyã'wë yüurra', tyajy cacue'sva jyuca neeweya' äjana. ³ Nwëese'cjantja'w jimba yuwete frenu paatje', atsa' tyã'wë yüurra' jimba cacue's ewsu caajya' äja'tja'w. ⁴ Mjiyuwe, barco tyacue seena' walasa's wejya wala fiisu jyüna u'jutsteva, barco's caajsa' timon le'chcuesajurráa tupjyna cu'lec caja'. Atsa' barco tyacue seena' walasarrava nwëese'je'c ma'wë caatjeva. ⁵ Tyã'wëy cue'sh cacuete tjune wala le'chcuëesa ji'ptja'w, nava seena' yuj walasa na'wë we'weya' chjächja'. Tyã'wëy ipy macue le'chcuëesarrava, yu'cj macue seena' walateva jyuca cambuna. ⁶ Cue'sh tjuneva ipy na'wëysarrá', cue'sh cacue's jyuca suwrra naa quiweteva jyuca äawa'jsa's cue'sh cacuete qui'pni ji'ptja'w. Bagachte yujva üchjamée infiernote ipy na'wësa'. ⁷ Yu'cj niimal vite' éega fyusa vite' yu'gawe'sh ech ma'wë seena' juuna'satyva nasa' caastyaja'jya' äja'ty. ⁸ Nava tjune yu'sa' quim yujva caastyaja'jya' äja'tsmeeta'. Tyã' veneno icjsa', tyãa pa'ga caastyaja'jya' ya'äja'tsme'. ⁹ Tyãa tjuneju Dyus cue'sh Tatanava wechana tuutje'je'tja'w, sa' tyãa tjunejuyurráa nasatyva wëeshuna ewmée atsewe'we'tja'w Dyus taqui'jrra nviitnisaty. ¹⁰ Andy yacjtjël'jwe'sh, tyã'wë yu' tyãa yuwejuyurráa Dyusna tuutje'jna qui' atsewe'wena yu'wawa'jme'. ¹¹ Teech yu'ítsterráa yu' shüusa casejna qui' yu' yaasava ¿casejma'c? ¹² Andy yacjtjël'jwe'sh, miiyajcywe: Shlala tasha' ¿ujtse yünya' äjama'c? Atsa' utse tasha' ¿shlala yünya' äjama'c? Tyã'wëy teech yu'ítsterráa yu' e'nz jwend casejya' äja'tsme'.

Na'wē yuunisarráa quijteva wala jiisa yuunisa'

¹³I'cue'sh cshavyte quijteva wala jiisa ūsrra', quijteva puimée zchichcue fi'nzewa'ja's mcaavya'ja'jwe. Tyā'wē wala jiisa' quijteva juuna' iijech yajcyna fi'nzewa'jme'. ¹⁴Nava i'cue'sh ūuste ewmée yajcyrra pui'nja sūjna yaacysa' tyā'wē wala jittj sūjna iijech yaacywa'j ji'pjme'. Tyā'wē yaacysa' quijte yujva jiimeesa išhiisa yuuna. ¹⁵Tyā'wē ewmée yūuwa'jrráa ūsutjenisa' Dyus caaūsutje'jnime'. Naa quiwetewe'sh peecy i'cue'sh ūus yaacynisarrá' echtjē'j caaūsutje'jnisa. ¹⁶Mteeva iijech yaacywa'j casejniū' puiiwa'jrráac vya'. Atsa' tyājūyā'j yu' jyuca suweena ewmeesarrarráac caseje'. ¹⁷Nava Dyus caaūsutje'jni's ji'pjsa' quijteva pcal yuumée fi'nzena, ewrráa yūuna, puimée nasaty peeygājna, išhiimée isa we'wena. ¹⁸Atsa' puimée ewrráa yūuna fi'nzewa'ja's pa'pchusa' ew wēt fi'nzewa'ja's yuuna.

Naa quiwetewe'sha's selpiite', na'wēc ya'yu'

4 ¹I'cue'sh pwe'sh puui jypacuena fi'nzeni' ¿majūga caseje'? I'cue'sh ūusujc caseje', ewmée yūuwa'ja's yaacypa'ga. ²Vitee ji'pjunity iiyamu wēerrava ājameerra', icjya'rráa i'cue yaaqui'. Vite nasa quijrráava ji'pjte', tyā'sna cusa'jya' ājameerra', puiiya'rráa i'cue pa'pchu'. I'cue'sh peejini's Dyusna pējymeerra i'cue uyya' āja'tsmée. ³Pējyrrava, jypa'gaya' yu' āja'tsmée i'cue, tyā'wē ewmeete cseelpi'jya'rráa pēypa'ga. ⁴Dyus yacj wej yujva ewmée fi'nzesa mwēese'jwe: Naa quiwetewe'sha's selpiina fi'nzesa' Dyus yacj puinisate jiimeevá'cue. Maava naa quiwetewe'sh yacjrráa wēt fi'nzeyā' yaacysa' Dyus yacj puisac yu'. ⁵Tyā'wēteva, cue'sh ūuste nviitnisa Dyus Espiritu' wala cchjāachja'jna ūsa' jī'c Dyus librute fi'jnisa' tyā' išhiinisame'. ⁶Naapcachja' Dyusa' jwee'frráac cue'shtyi peeygājra pu'chji' quijteva. Tyājíc Dyus libru' na'wē pta'shi': Dyusa' pu'chji'tsme' iijech yaacysatyi', nava iijech yajcymée fi'nzesatyi' wala peeygājna pu'chjina jī'c. ⁷Tyāa pa'ga Dyusrráana nwēese'jrra echtjē'ja's nwēese'jmée chjāchja miiyajcywe, atsa' echtjē'ja' i'cue'sh tashu ājameerra tyuteena u'juena. ⁸Dyus tashte mutyaawe, atsa' tyāava i'cue'sh yacj utyaana. Pcalsawe'sh, ewmée yūuni cusety miiyaatewe. Tyā'wēy Dyusa'srráa yajcymée e'nz jwend yaacysa i'cue'sh ūusa's miiyaatewe. ⁹Sa' tyā'wē ājmeene'tca'w yūu sūjna miiyajcywe, sa' shijcana fi'nzepa'ga āchja' ū'newa'ja's miiyajcywe, sa' wechana fi'nzepa'ga āchja' ūuswa'ja's miiyajcywe. ¹⁰Āchja' Dyus dyi'pte seena' yuj ājmeecuesa myuuwe, atsa' tyā'wē yūusa's walasa vituna Dyusa'.

Yacjtjē'jwe'shtyi ewmée nuywe'weni

¹¹Yacjtjē'jwe'sh, i'cue'sh pwe'sh puuty ewmée ya'nuywe'wenuwe. Maava yacjtjē'ja's ewmée nuywe'wesa' Dyus jycaajni ley peeygāawa'ja's we'we'c tyā'sna weehsa yuuna. Atsa' Dyus jycaajni leya's weehsa' tyāa

leya's nwēese!jepcachte leya's jycaajsa na'wēsa yuuna. ¹²Tyāa pa'gatey leya's nviit-sa' teech yuurráa ūsa!. Tyāaírráa ewmeete nviitwa'jsa' sa' tyāaírráa qui' nwe'weya'va ājawa'jsa!. Tyā'wēte!, ħindyrráa jwee quimrranga tyā'wē yacjtjē'jwe'shtyi' ewmée nuywe'we'!

Cuscuscjē' quij yuuya'vateva jiimeec ya'fi'nze'

¹³Āchja' i'cue'sh na'wē we'we'i'cue tyā's mjiyuwe: I'cue'sh we'werra'! Āchj u'ljmeerra' cuscusa' u'jue'nja'w chjamb walan. Cytee pa'jrra teech añu mjírra vyu wala cnayna ūsu'nja'w jī'l'cue. ¹⁴Nava cuscus fi'nzewa'ja's jiimée i'cue. Cue'sh ityi fi'nzeni' na'wēsarrá!: Yu' ajva ma'wēga tunderráa vyaarra' ēecjēe ptsu!, tyā'wēysarrá' ityi fi'nzenisa!. ¹⁵Tyāa pa'ga na'wērráa yaacywa'ja': ityi fi'nzewa'j Dyus peesuváana atsa' ma'wērráava mjī'nja'w jīwa'ja!. ¹⁶Nava tyā'wē yajcymée ūuste iwejchrráa i'cue yajcyrra we'we'. Tyā'wē yajcyrra we'wenisava ewmeesafírrá!. ¹⁷Maava ew yūuwa'ja's jírra ew yūumeerra!, Dyus dyi'pte yuuwesa yuuna.

Ji'pjsawe'sh mpa'yajcywe

5 ¹Āchja' wala ji'pjsawe'sh mwēese'jwe: I'cue'sh ji'pjuni ptsuute seena' yuj ñussa pa'jana tyā'sna yajcyrra weyna mpembeewe. ²I'cue'sh ji'pjunisa' quij yujva seelpime' jyuca wa'wani!, atsa' i'cue'sh ropa ewsava tyā'wēy jyuca wes ūni!. ³I'cue'sh vyou bej vyou chijmeva jyuca inz ūni!, atsa' tyāa vyu inz ū'nisafírráa i'cue'shtyi' seena' wala ewmée ñus quiwete acjwa'jsa!. Tyāa vyu' i'cue'shtyi iviituya'va' ipy na'wē. Naa nmej ensu' i'cue'sh ji'pjuni's iiméj wala jyaaw i'cue. ⁴I'cue'sh uutjashte mjíisa yuul pēyni's Dyus cielute jycaajna ūssa' wēse'cj, atsa' i'cue'sh piuntyi yuulunisa tyā'wē i'cue'shtyi ewmeete nvijt-ya'va!. ⁵I'cue'sha' naa quiwete ji'pjunisa yacj wala wēt wechana fi'nze'i'cue tajcy na'wē niishna tyāa pa'ga icjwa'j en pa'jya'va!. ⁶Nasa ewmeesata' jírra i'cue'sha' ewterraj icje'i'cue yuuwemeesateva, atsa' tyāawe'sha' cyulterráa uuwa'ja's ji'pju'ty.

Tjēysa pa'tjeva ñusmée fi'nzeni, tyā'wēy ātsa'sa pa'gateva Dyus yacj puuty we'wena

⁷Tyā'wē pcyuutsteva, yacjtjē'jwe'sh ñusmée chjāchja miyajcywe, cue'shtyi jype'jsa Jesucristo naa quiwete quijpcach. Ma'wēga mjíisava ujrra' cuchwaljmée ūytjasu!, nus en scjēwte!, ū'a's wala pcjacje'nja sūjna. ⁸I'cue'shva tyā'wēy cuch yajcymée chjāchja yajcyna mūytjaswe. Tyā'wēme!, cue'shtyi jype'jsa Jesucristo quíiwa'ja' utyaatsa!. ⁹Yacjtjē'jwe'sh, puuty ūuschawe'wena fi'nzenuwe, Dyusa' i'cue'shtyi ewmeete nviitcaymen. Tyā'wēme!, yuwee cu'le'sa cjuēs pa'jwa'j en utya yā'j ūsa!. Tyā' Dyusa!. ¹⁰Tyāniitey Dyus yuwe's pta'shsawe'shva ma'wēta pytjaa yuuna fi'nzerrava Dyusrráana yajcyna fi'nze!, tyā'wēy tjēysa ñuswa'j vyaateva, Dyusrráana yajcyna mfi'nzewe yacjtjē'jwe'sh. ¹¹Tyā'wē

pytjaa ñuste fi'nzesatyi' Dyus yacj wēt fi'nzesata' jī'tja'w. Job pytjaa ñuste wantāyna fi'nzete', nmejte' Dyusa' wala peeygājrra pu'chni's iiwēse'ji'cue i'cue'sha'. Dyusa' peeygāasa', tyāasa pu'chya' ūsa'.

¹²Andy yacjtjē'jwe'sh, wala mpa'yajcywe. Isasa's jirra' jījtj jīwa'jrrá', sa' jiimeerra' jiimeetj jīwa'jrrá'. Tyā'wē Dyus uyte jiimeetj jīwa'jme', sa' cielu quiwe tyā'wēsatyva cysusna pta'shwa'jme', Dyusa' ewmeete nviitcajmen.

¹³I'cue'sh pwe'sh maava ñuste fi'nzena ūsrra', Dyusrráana neewe'wena meswe. Maava wēt fi'nzena ūsrra', Dyusa's wechana memna meswe.

¹⁴Maava acate uuya' ūsrra', ancianowe'shtyi mpa'yawe, atsa' tyāawe'sha' Dyus cusete neewe'werra aceite qui'putyna. ¹⁵Tyā'wē Dyusa' pu'chjina sūjrra oraite', ātsa'sa pcala' peltunāyni yuute, ātsa'sa' ewte neeyūuna, tyajū' Dyusa' nuycatyjina. ¹⁶Dyus dyi'pte ājmée yūuni's puuty ya'mpeeta'shwe, atsa' Dyusa's yacjtjē'jwe'sh neewe'wete', ātsa'sa' catyjine'cue. Dyusna nwēese'jsa tyā'wē ūusuj jyuca Dyusna yajcyrra neewe'weni', quījteva jyuca pu'chwa'jsa'. ¹⁷Ma'wēga Dyus yuwe pta'shsa Eliasva cue'sh na'wēysarráarrava, nus pa'cjamen Dyusna ūusuj jyuca yajcyrra neewe'we, atsa' nus pa'jme' tecj añu y medio ājpcach. ¹⁸Tyajū' qui'quin Dyusna neewe'wec nus quīicajn, atsa' naa quiwete qui' nus pa'tje', uutjash chjāchjaty.

¹⁹⁻²⁰Andy yacjtjē'jwe'sh mjiyuwe: I'cue'sh maava Dyus dyi'pte jypumbate', jypumbasame' tyāa jypumbasa's ewmée dyi'ju caashwendu'juna. Sa' tyā'wē yūurra' jypumbasá ūus jyucate vituwa'j yā'j ūsteva, nwe'wesa yuuna, sa' maanzcuēe pcaltyiva caapeltunai'jsa yuuna.